

Қылмыстың алдын алуға және жолын кесуге жәрдемдескен, қоғамдық тәртіпті қорғауға қатысатын азаматтарды көтермелеу ережесін бекіту туралы

Күші жойған

Қазақстан Республикасы Үкіметінің 2000 жылғы 12 тамыздағы N 1243 Қаулысы.
Күші жойылды - Қазақстан Республикасы Үкіметінің 2019 жылғы 7 ақпандағы № 37 қаулысымен

Ескерту. Күші жойылды – ҚР Үкіметінің 07.02.2019 № 37 қаулысымен.

Қазақстан Республикасының азаматтарын құқық тәртібін және қоғамдық қауіпсіздікті қорғауға қатысуға белсенді тарту мақсатында Қазақстан Республикасының Үкіметі қаулы етеді:

1. Қоса беріліп отырған Қылмыстың алдын алуға және жолын кесуге жәрдемдескен, қоғамдық тәртіпті қорғауға қатысатын азаматтарды көтермелеу ережесі бекітілсін.

2. Облыстардың, Астана және Алматы қалаларының әкімдеріне жергілікті бюджеттерді әзірлеу кезінде қылмыстың алдын алуға және жолын кесуге жәрдемдескен, қоғамдық тәртіпті қорғауға қатысатын азаматтарды көтермелеуге ақы төлеуге қаражат көздеу ұсынылсын.

3. Осы қаулы 2001 жылғы 1 қаңтардан бастап күшіне енеді.

Қазақстан Республикасының
Премьер-Министрі

Қазақстан Республикасы
Үкіметінің
2000 жылғы 12 тамыздағы
N 1243 қаулысымен
бекітілген

**Қылмыстың алдын алуға және жолын кесуге жәрдемдескен,
қоғамдық тәртіпті қорғауға қатысатын азаматтарды көтермелеу
ережесі**

Осы Ереже қылмыстың алдын алуға және жолын кесуге жәрдемдескен, қоғамдық тәртіпті қорғауға қатысатын азаматтарды көтермелеу мәселесін реттейді.

1. Қылмыстың алдын алуға және жолын кесуге жәрдемдескен, қоғамдық тәртіпті қорғауға қатысатын азаматтарды көтермелеу мәселелерін облыстың, республикалық маңызы бар қаланың, астананың, ауданның (облыстық маңызы

бар қаланың) жергілікті атқарушы органдары құратын комиссиялар (бұдан әрі - комиссия) қарайды.

Ескерту. 1-тармаққа өзгерту енгізілді - Қазақстан Республикасы Үкіметінің 2008.03.26 N 291 Қаулысымен.

2. Комиссияның құрамына жергілікті өкілді органдардың, жергілікті атқарушы органдар мен ішкі істер органдарының өкілдері енгізіледі.

3. Қылмыстың алдын алуға және жолын кесуге, қоғамдық тәртіпті қорғауға, қоғамдық қауіпсіздікті қамтамасыз етуге белсенді қатысатын азаматтарды ақшалай сыйақымен көтермелеу жөніндегі ұсыныстарды комиссияның қарауына ішкі істер органдары ұсынады.

4. Комиссия қабылдаған шешім - көтермелеу үшін, ал комиссия қабылдаған шешімге сәйкес ішкі істер органы басшысының бұйрығы - көтермелеуге ақы төлеу үшін негіз болып табылады.

5. Ақшалай сыйақының мөлшерін комиссия қоғамдық тәртіпті қамтамасыз етуге көтермеленетін адамның қосқан үлесін және ол немесе оның қатысуымен жолы кесілген құқыққа қарсы әрекеттің нәтижесінде келтірілуі мүмкін залалдың көлемін ескере отырып белгілейді және ол, әдетте, 10 есе айлық есептік көрсеткіштен аспайды.

6. Ақшалай сыйақы төлеуді, көтермелеуге ұсыныс енгізген ішкі істер органдары жергілікті бюджеттердің қаражаты есебінен жүргізеді.

7. Көтермелеуге ақы төлеуге арналған қаражат ішкі істер органдары шығыстарының құрамында жеке бағдарламамен көзделеді.